

PIDIPOS YACNOCQUIDON ISTE

Pabadon tauamboen chiaid

1 ¹Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ²—Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. ⁴Aden mibi tantiaquin Nuquin Papa chiech bëdambo yec cuishonquebi. ⁵Ënden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. ⁶Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi

tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. ⁷—Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiech cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoe. Adsho mibitsen tantiembi. ⁸Esusën matses tantiacpadomboen mibi tantiac unësquo iquec. Mibi istiadquo iquebi. Ëbi adsho tantiaash Nuquin Papatsen: —Abimbo caic —quendac. ⁹Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. ¹¹Adec con Icbo

Esus tantiec bēdamboec tabadsho isun:
 “Bēdamboen tabadmec Nuquin Papa
 bēdambo iquec,” quetsiash utsibo, Papa
 —quequin Nuquin Papa chianembi mibi
 tantiaquin.

Utsibon Esus chuibeniaid

¹²Quēnēn nauedac ěmbi Esus
 chuibenetiapimbo icnubi utsibon
 chuibeniac utsin-utsinquin Esus
 tantianenac caosh. ¹³Nēshun shubu
 dadpen icquid Doma yacnoshon:
 —Quēnēn nauedaid cuenushe
 —quequin ěbi isquido sondadon:
 —Esusēn naid chuibansho Pabado
 quēnēn nauedac —quequin tantiec.
 Aidon chiac nēmbo icquido utsitedishun
 adembidi tantiec. ¹⁴Quēnēn nauedaqui
 dacuēdenquoio iquebi. Ěbi adquoio icnuc:
 —Pabadon nacpadomboen
 dacuēdenquoio icquin Esusēn naid
 chuibanembi —quepac caosh Esus
 tantiaquido dadpen. Adshun
 dacuēdbodombi dacuēdenquoio yanquin
 Nuquin Papan chiaidquoio chuibeniac
 caosh.

^{15,16}Aidon ěbi bēdamboen tantiaquin
 Esusēn naid chuibenec. —Pabado
 tantiembi. Esusēn naid chuibenesho
 bedshun quēnēn nauedac aidēn
 natiapimbo icnuc ěmbiquien nanu
 —quequin ěbi bēdamboen tantiaquin
 Esusēn naid chuibeniac caosh.
 Utsibombien ěbi chieshēnquimbi Esusēn
 naid chuibeniac caosh. —Quēnēn
 tsadunac ma Pabado mēyadbudchitono.
¹⁷Aidēn chuibantiapimbo icnuc
 ěmbiquien nanu. Aden ěmbentsēqui
 chuibanac dadpenshun tantiasun:
 “Mibi bēdambo iquec,” ěbi catsiash
 —quequin Esusquo tantienquoio
 icquimbi Esusēn naid chuibenec.
¹⁸—Ěbi chieshēnec —¿quiashtabi
 nēishpe? Padenquoio. —Ěbi
 chieshēnquidon ěbi bēdamboen

tantiaquidobēdtambi Esusēn naid
 chuibanac matses utsibo utsi-utsiec Esus
 tantiaquido yanec —quiasb bēdambo
 yec cuishonquebi. Adecbidi
 cuishonquebi: ¹⁹—Pidipos
 yacnocquidon Nuquin Papa ěbi chianiac
 caosh —quiasb. —Mēyadsho Pabado
 chieshtomenda, Papa. Abi quēnēn
 nauedquidon puduemequin nidmeta,
 Papa —quequin mimbi
 chiacpadomboen namenuen Nuquin
 Papan Esuquidistun Mayan menequin
 cuesambo icmiac chieshtoenquoio
 iquendabi. Adembidi aidēn nac quēnēn
 tsadenquoio iquendabi. ²⁰Ěmbi
 naondacpadomboen dacuēdenquoio
 icquin Esusēn naid chuibantiadquoio
 iquebi. Chieshtotiapimbo iquebi. —Ma
 utsibon: “Esuquidistu bēdambo iquec,”
 canu —quiasb aduidequi iquebi unēsabi
 yec. Utsin: —Cuesunechitono —caqui
 adecbidi chieshtoenquoio ictsiabi.

²¹Unēsabi Esuquidistu tantiec bēdambo
 iquebi. Unēsash Esusbēd tabadequic
 bēdamboshē ictsiabi. ²²¿Mitsipadtebi
 bumpeba? ¿Unēstedabi bumpeba?
 ¿Unēsenquoio yec tsadtedabi bumpe?
 Unēsabi icquin ěmbi Esusēn naid
 chuibanac utsibon Esus tantiabentsiash.
²³Nuquin Papa yacno nidash Esus isec
 bēdamboshē ictsiabi. Esus iste bunquiebi.
²⁴Aden tantiequi: —Unēsabi yec Pidipos
 yacnocquido Esus tantiaquido Esus
 bēdamboen tantiamec ano nidtsiabi
 —quequin tantiec unēstiapimbo icoaibi.
²⁵Unēsabi yec mibi yacno nidoatsiabi.
 Aden tantiec: —Nuquin Papan nēbi ěbi
 unēs uamenquoio iquec —queoaibi. Mibēd
 tabadquin Esusēn naid bēdamboen
 chuibantsiambi. Adoac bēdiactsēc Esus
 tantiatsēcboedombi Esus tantiaquieci mibi
 bēdambo ictsiac. ²⁶Ěbi choacsho isash:
 —Pabado padpidec chomequid Esus
 bēdamboshē iquec —mibi quetsiac. Adece
 mibi cuishonquetsiac.

Chieshtoenda, quequin Pabadon chiaid

²⁷Ēbi ano nidtiapimbo icnuc Esusën chiacpadec chieshtoenquo yec bēdamboec tabadta. Quēnēn ēbi nauedboedēn puduemiac mibi yacno nidshun mibi bēdamboec tabadsho isash: —Pidipos yacnocquidon ēmbi chiacpaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuēshēdenquo yec Pidipos yacnocquido bēdamboec tabadosh. ²⁸Esus chieshēnquidon: “Esusën naid chienda. Cueschitomane,” caqui dacuēdenquo icquin Esusën naid adembi chuibanosh —quequin mimbi naid chuisho tantiash bēdambo ictsiabi. Adec cuesambo yec nuqui: —Nuquin Papan icmiacpadec dacuēdenquo iquebi. Ēbi dacuēdenquo icmequidēn ambi chiacpadomboen ēbi chieshēnquido unēsacsho icsambo icquido cuidacno nidmendac. Ambi chiacpadec Esus tantiaquid yec unēsashini Nuquin Papa yacno tabadendac —quequin nuqui tantiatsiac. ²⁹—Con Mado Esus tantiasho utsibon chieshēntsiandac —quequin Nuquin Papan tantiacpadomboen utsibon mibi chieshēnendac. ³⁰Ēbi nacpadomboen mibi chieshēnoaic. Mimbi isnuc ēbi chieshēnondash. Adembidi ēbi chieshēnoaic nēbi. Nēid dada uaid isquin: —Pabado padpiden chieshēnoac —quequin mimbi tantiendac.

Utsi tantiec tabadta, quiaid

2 ¹Tantia, con utsibo. Mibitedi chuinu. ¿Mitsipadquo Esus tantiaquido icpec? Esuquidistu tantiaquiec dayacquo yac bimboec iquec. Adecbidi Esusën tantiaido yec bēdambo icquido nec. Adecbidi Nuquin Papan aton Mayan abēd icmequin

bēdamboec tabadquid icmiadobidi nendac. Adoaido matses tantiaquidombo nec. ²—Adquidbidi nebi —quec adquiecbidi bēdamboec tantianancuedeta. Ēbi cuishoncamenuc adta. Abitedi: —Esusën chiacpadomboen nanuna —quecuedec chieshēnanenquo yec bēdamboec tabadta. ³Nadec onquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashuntiaquo iquebi —quec bēdamboec tabadta. ⁴Mimbi tantiacpadomboenuidi nainquo icquin utsin tantiacpadomboentsen nata. Mitsanauidi tantienquo icquin utsibo nashuntetsen tantiata.

⁵Esuquidistun nacpadomboen naic mibi bēdamboshē ictsiac. Aidēn chieshtoenquo icquin Nuquin Papan chiacpadomboenuidi napanēdash.

⁶Aton Papa Nuquin Papapadquidquo yec Esus abitedishun Icbombo nepanēdash.

Aton Papabēd yec bēdamboshē icboedi: —Padi icnuna. Nuquibi namec bēdambo iquebi —quenquo yec Nuquin Papan chiacpadomboen naic auēshquo chopanēdash.

⁷Adec aton Papan yuabimboecquid yanash ambi chiacpadec matsespanēdash chidon tishac.

⁸Adashic matses yec aton Papan chiacpadequi abided cuidadec unēspac caondash.

Matses icsamboshē icquido cuidac bimboen cuesten dectanquin icsaisambobi Esus unēs uapac caondash.

⁹Aden ambi chiacpadomboenuidi Esusën nasho isun Nuquin Papan

uincuemeshun abi yacno
chomeoashun abëdi Esus
tabadmepanëdash.

Aden abitedishun Icbombo
icmeoapanëdash.

^{10,11}—“Nuquin Icbombo Esuquidistu
bëdamboshë iquec,” ma abitedi
quenu —qeshun aden Nuquin
Papan abitedishun Icbombo Esus
icmeoapanëdash.

—Ëmbi ëbi yacnoshon uaido mayan
bëdabo yec nidaidën tabadquido
matses yec unësacsho
uincuemiaindo yec quequido:
“Nuquin Icho Esuquidistu
bëdamboshë iquec. Abi
abitedishun Icho icmeoaquid
Nuquin Papatsen bëdamboshë
iquec,” ma quenu —qeshun
adopanëdash.

Utsibo Esus tantiamete chiaid

¹²Mibi tantiaquiembique. Tanta, con
utsibo. Mibitedi chuinu. Esusën
nacpadomboen mimbisen bëdamboen
nata. Ëbi mibëd icnuc mimbi
nadeniondacpadomboen ëbi nibëdnuc
adembidi bëdamboen nata. —Nuquin
Papa dacuëdampambo icquidën chiaid
niacmane —quiash ambi
chiacpadomboen naic aidbëdi
tabadnush bëdamboec tabadta. ¹³—Ma
bëdamboec tabadnu —quequin Nuquin
Papan ambi chiacpadec tabadte
bumequin nuqui bëdamboen
tabadmeque. Bëdamboec tabadta.

¹⁴Adec bëdamboec tabadec
chushcananenda. Adecbidi:
—Bëdamboen nanuna —cac chieshec
tabadenda. ¹⁵—Esus tantiaquido
icsambo iquec —utsibo quenushe.
Adenda. Nuquin Papan: —Con mado
nec. Con champi nec —caido yec
bëdamboec tabad. Matses dadpenquio
icsamboshë icnubi adequi bëdamboec

tabad. Adec bëdamboec tabadquin
icsambo icquido mimbi Esus
bëdamboen tantiametsiac
paposhquiacbimboecnuc. ¹⁶Mimbi
adoac utsin: —Esus tantiasho Nuquin
Papan ëbi bëdamboen isec. Nëbi
bëdambo yanec unësashini aidbëd
tabadendac —quequin tantiatsiash.
Aden mimbi chuibanaido Esus
tantiaquido yansho isash
cuishonquetsiabi. Esuquidistu nidaidën
padpidec chote ushën bëdambo ictsiabi.
—Ëmbi chuibanondaido Pidipos
yacnocquido ambi Esus tantiamiaidobëd
choeque. Is —quec bëdambo ictsiabi.
¹⁷—“Bëdambo mibi iquec,” Nuquin
Papan mabi canu —qeshun Esus
tantiaquin mimbi bëdamboen nac.
Utsibo nashunquin Esusën naid
chieshtoenquio icquin mimbi chuibanac.
Mimbi adoaid chuisho tantiashun:
—Mibi unës uanu —caquini bëdambo
ictsiac. —Aido bëdambo iquec
—qeshun mibi tantiec bëdambo yec
cuishonquetsiabi. ¹⁸Ëbi unës uaid
chuisho tantiash adecbidi bëdambo icta.
—Esus tantiec chieshtotiapimbo icsho
Pabado unës uac —quiash bëdambo
icta.

Pabadon Timoteyo chiaid

¹⁹Con madobimboecquid ëbëd icquid
Timoteyo mibi yacno nidmetsiambi.
—¿Midapadquiec Pidipos yacnocquido
tabadeque? Istan, mado —quequin
nidmetsiambi. Esuquidistun adembidi
tantianuc adëtsiambi. Adoac istanshun
chuituidac bëdambo ictsiabi.
²⁰Timoteyopadquid utsi nibëdec. Aid
abentsëcshumbi ëmbi nacpadomboen
mibi tantiaquiec. ²¹Utsibombien aton
nauidtsëqui tantiaquin Esuquidistun
chiacpadomboen natiapimbo iquec.
²²—Timoteyon bëdamboen naondash
—quequin mimbi tantiec. Mimbi

tantianubi ëbëdtan Esusën naid
 chuibanondash con mado
 icbobimboecquin. Aid bëdambo iquec.
²³Adquid icsho mibi yacno: —Istan
 —catiadquio iquebi. Ëbi quënën
 nauedquido ëbi caic: —Unës uanu
 —quesho tantiabono. Tantiashun: —Ëbi
 quënën nauedquidon chiaid Pidipos
 yacnocquido chuitan, Timoteyo
 —catsiandambi. ²⁴Ëbitsen nëbi mibi
 yacno nidtiadquio iquebi. Ëbi caic
 Nuquin Icbo: —Ma nidnu —quenuc
 anobi nidtsiabi.

Epapadodito chiaid

²⁵Epapadodito con buchibimboecquid
 mimbi: —Pabado nashuntan —cac
 Pidipos yacnuësh chonëdaid nëmbo
 iquec. Utsibon chieshënubi
 dacuëdenquio icquin ëbëdtan Esusën
 naid chuibanondash. Adondaïdi nëbi:
 —Mibi iccondacno tabadec nid, buchi
 —caombi. ²⁶Aid mibi tantiec unësquio
 yec tsadposh. —Ëbi unëstsemboed con
 matses chuinnec Pidipos yacno
 nidaccosh —quiash mibi ismete
 bunquieci shubiantiadtscëquio tsadposh.
 Adsho isun: —Min shubuno nidec nid
 —caombi. ²⁷Adec unëstsenquiondash.
 Adshobien Nuquin Papan bëdamboen
 isquin bëdamepondash. Ëbitsen
 bëdambo icmenuen Nuquin Papan
 adopondash. Epapadodito unësquio
 icnuc ëbi shubiec tsadsho isash: —Aid
 unësan unësquio icnuc Pabado
 mëyadnushe —queshun Nuquin Papan
 Epapadodito bëdamepondash.
²⁸Adoacsho mibi yacno aid badedquio
 nidmetiadquio iquebi. Aidbëd iquec
 mibi bëdambo ictsiac. Mibi yacno
 nidsho isash ëbitsen bëdambo ictsiabi.
²⁹Epapadodito nidacsho bëdamboen ista
 cuishonquequin. —Nuquin Icbon mibi
 bëdamiac. Aid bëdambo iquec. Mibitsen
 bëdambo iquec —quequin chuita matses

dadpen tantiamenuen. Adquid Esus
 chuibanquido utsibo mibi yacno
 nidacsho adembidi bëdamboen ista.
³⁰Esuquidistun chiacpadomboen naic
 ëbëdi tabadec Epapadodito chondash.
 Chieshëmënquido dadpen icnubi ëbi
 nashunec tabadec daicsabudash
 unëstsenondash. Chotiapimbo icquin
 mimbi: —Pabado nashuntan —cac
 choash nibëdantsenondashe. Mibi yacno
 nidacsho bëdamboen ista.

Esusuidtsëqui tantiasho Nuquin Papan bëdamboen isaid

3 ¹Nuquin Icbo Esus tantiec
 cuishonquenuna. Aduidequi icac
 bëdambo ictsiash. Tania, con utsibo.
 —Tantienquio yanushe —quequin ëmbi
 chiondaïd dada uaquin padpiden mibi
 chuioanu. ²Muaquidon chuisho
 tantienda. Aidon: —Shui dëbid
 dëteshun secaidouidi Nuquin Papan
 bëdamboen istsiash —quequin chuisho
 tantienda. Aden chiec icsa
 uanquidombo neque.
 Uimanëmënquidoen nechitec. ³—Shui
 dëbid dëteshun secaid nec
 —¿queshunda Nuquin Papan nuqui
 bëdamboen ispec? Padenquio. Aidon
 Esus tantienquio icsho bëdamboen
 isenquio icquin aton Mado Esus
 tantiaquidoen Nuquin Papan
 bëdamboen isec. Aton Mayanën
 tantiamiac: —Nuquin Icbo Esuquidistu
 bëdamboshë iquec. Abided cuidadec
 unësaid tantiasho Nuquin Papan nuqui
 bëdamboen isec. Ëmbembi naquin
 Nuquin Papan bëdamboen ismetiapimbo
 iquebi —quequin nuqui tantiec.
⁴Matsesën tsusedpan chiaïduidi
 tantiasho Nuquin Papan bëdamboen iste
 icnuc nadtsiabi. —Tsusedpan chiaïd
 utsibon daëdpactsëc nanuc ëmbimbo
 naquin dadpenquio nabanombi. Aden
 ëmbimbo dadpenquio nasho Nuquin

Papan ëbi bëdamboen isec. Adembidi isadaidbombo icsho ëbi bëdamboen isoaic —quetsiabi. Nëbi adtiapimbo iquebi. ⁵Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dëbid dëteshunenëdaidquio nebi. Con mases tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquio padiseyobo caid niondabi. ⁶Adquid icquin icsambo icquido danquin Esus tantiaquido cuesun secatiadquio iccondabi. Nuquin Papan chiacpadomboen natiadquio iquequi adondabi. Moisesën chiampiduidi nate bunquiondabi.

⁷Adquid icquin Esus tantiabi: —Ëmbimbo naic bëdamboshë iquebi —quequin icsamboen tantiapondambi. Adondaiddi Esus tantiabenash: —Ëmbimbo naiquini icsambo iccoc. ⁸Nëbi con Icbombo Esuquidistu tantiec bëdambo iquebi —quequin tantiabenondambi. Aiduidtsëqui tantiatiadquio icquin icsa secacimboen ëmbimbo naid ënondambi. ⁹Esus tantiate bunqueibi. Adquid yec: —Moisesën chiampicpadomboen ëmbimbo naiquini bëdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bëdamboen isquin ëbi bëdamboen tabadmec —quequin tantiabenondambi. ¹⁰Aden tantiabenshun Esusuidtsëqui comapenen tantiatiadquio iquebi. —Comapenen tantiaquin Nuquin Papan uincuemiaid icquin Esusën bëdamboen tabadmetsiashi —quec Esus tantiate bunqueibi. —Nuquin Papan chiacpadomboenuidi nasho mëyanac Esus unësac caondash. Adembidi Nuquin Papan namiacpadomboen nasho

mëyanac chieshtotiapimbo ictsiabi.

¹¹Unësambo icsho Esusën bëdamboen tabadmetsiashi. Unësacsho Nuquin Papan uincuemetsiashi —quec adec Esus tantiate bunqueibi.

Nuquin Papan chiacpadomboenuidi nate bunaid

¹²Tantia, con utsibo. Mibitedi chuinu. —Nuquin Papan chiaid niaquesambo nebi —¿quetabi ique? Padenquio. Adquio ictiadquidi adquio yenquieni icchitec. —Bëdamboshë icmenuen Esuquidistun yuapondashi —quequin tantiec bëdamboshë icte bunqueibi. ¹³Adec bëdambo yanabi yec: —Ëmbi naboed naic bëdamboshë iquebi —quenquio icquin Esusquio tantiaquin ambi chiacpadomboen natiadquio iquebi. ¹⁴—Bednu —quequin bedteuidtsëqui tantiec titinquiabimboen Esusquio tantiaquiec ambi chiacpadquiec bëdambo ictiadquio iquebi. —Adec tabadec unësacsho Nuquin Papan abi yacno ëbi tabadmec —quec bëdambo icte bunqueibi.

¹⁵Nuquin Papan chiacpadomboen natiadquio icquin ëmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquio icquin abentse-abentsen naindambi —quesho Nuquin Papan ambi tantiaid bëdamboen tantiametsiash. ¹⁶Nëbi nuqui icbocpadquiec tantiananquiec bëdamboec tabadnuna.

¹⁷Ëbi yacpadquiec bëdamboec tabadta. Ëmbi chiacpadomboen utsibon nasho isun adomboembidi bëdamboen nata. ¹⁸Ëmbi chuideniondacadpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dectamëdaiddi Esus tantiaquid nebi —quetsëcboedi icsamboec tabadec. Adquido Esus

tantiaquidpenquio nec. ¹⁹Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquio icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. ²⁰Padnuen Nuquin Papan bëdamboen isaido yec aidbëd tabadtequido nuqui nec. Abi yacno buanuec abucuësh Nuquin Icbo Esuquidistu chosho isnuec nuqui tabadec. ²¹Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquio nuqui iquendac. Abitedishun Icbombo icquin ambi chiacpadomboen abitedi namequidquio icquin aden nuquin dada chuca uaindac.

Esus tantiec cuishonquiaid

4 ¹Ëmbi aden chuisho tantiasch Nuquin Icbon chiaid niaquenquio yec bëdamboec tabadta. Mibi tantiaquin mibi istiadquio iquebi. Mibi caic: —Ëmbi chuibanondaido Esus tantiabenasch bëdambo ictiadquio iccondash —quec bëdambo iquebique. Adquiec chieshtoenquio icquin Esus tantiec bëdamboec tabadta.

²Tantia. Nëbi chido daëd Ebodia caid Sintique caidbëdtatsen chuinu. Amicananenda. Esus tantiaquido yec: —Ai, Nuquin Icbo Esusën tantiacpadomboembien natiad —quec tabadta. ³Tantia, buchi. Èbëdtan Esus chuibanondaid icsho mibitsen chuinu. Aid chido daëd chuiquin: —Bëdamboec isnanta —cata. Utsibon chieshënubi èbëdtan aid daëdshun Esusën naid chuibeniondashe. Adembidi Quedemente caidëntsen èbëdtan chuibanondash. Adembidi utsibontsen. Adquidotedi Nuquin Papan: —Esusbëdta ëbi tantiaquido mibi neque. Èbëd tabadec cho —caindac.

⁴—Nuquin Icbo Esus tantiaquiec bëdambo yec cuishonquenuna —caimbi. Esus tantiaquiec cuishonquenuna.

⁵—Ma utsibo: “Esus tantiaquido chieshëmënenquio yec bëdambo iquec,” ma quenu —quiash bëdamboec tabadnuna. Nëbi Nuquin Icbo Esus choeque.

⁶Adecbidi chishpiquec tabadenda. —¿Atotsimbi napeba? ¿Atotsimbi pepeba? ¿Nëbida con matses unëspeba? —quequin uesquin tantienda. Padenquio icquin nuqui dacuëdquin tantiaidtedi Nuquin Papa chuinuna. —Ëbi nashunquin utsibotsen nashunta, Papa. Aden nashunec mibi bëdambo iquec, Papa —quequin Nuquin Papa chuinuna. ⁷Aden nuqui chiac aidëmbi nuqui bëdambo icmec dacuëdenquio icnuc. Adoac bëdambo icnuc utsibo: —¿Mitsipadec dacuëdenquio yampash? —quetsiasch. Nuquitsen: —¿Mitsipadequini bëdambo yampo? —quetsiac. Adec: —Nuquin Papan ëbi nashunquidquio nec —quequin Nuquin Papa chianequin Esus tantiaquiec nuqui dacuëdenquio yec bëdamboec tabadtsiac.

Bëdamboshë iquec, caiduidi tantiata, quiaid

⁸Tantia, con utsibo. Nëidtsen chuinu. ¿Atotsi abimbo chiaid icpec? Adquid tantiata. ¿Atotsi bëdambo icpec? ¿Ttsutsi bëdamboec tabadquid icpec? Adquidtsen tantiata. Aden: —Bëdambo iquec —caidtedi tantiata. ⁹Adembidi ëmbi chuisho mimbi tantiondac. Aden ëmbi chiondaid tantiaquin ëmbi naondacpadomboen nata. Adsho isash mibi dacuëdenquio icmequid Nuquin Papa mibëd iquendac.

Pidipos yacnocquidon bëmiaid

¹⁰Nëbi mimbi bëmiaid bedash bëdambo iquebi. Ènden mimbi aden

menianiondashumbic yuectaneshun nēbi ēbi tantiaquin mimbi meneoaid bēacsho bedombi. —Nuquin Icbon tantiacpadomboen padpiden Pidipos yacnocquidon ēbi ma menenuequin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ėnden bēmetiadquidi tsundan bētiambo icnuc mibi nepanēdac. ¹¹—Con na nibēdeque. Beccho —¿quectabi ique? Padenquio. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. ¹²Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. ¹³¿Ēbenquiodabi adti? Padenquio. Esusēn namiaquini adquo iquec. Aidēmbi namiac ambi chiacpadomboen naimbi. ¹⁴Adnuc: —“Mēyadec,” quiosh —queshun mimbi ēbi ma menenuequin bēmiaid bēdambo iquec.

¹⁵Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquio iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. ¹⁶Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —queshun mimbi piucquid bēmiaccondac. Yuectaneshun adembidi. Adshumbic padpiden. ¹⁷—Mimbi bēmiaid bēdambo iqueque. Utsi beccho —¿quequindambi aden chuipe? Padenquio. —Pidipos

yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. ¹⁸Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. ¹⁹Abitedishunquio Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquio nec. ¿Ada mitsana nibēdnuc mēyadac bimboec tabadpe? Adec mēyadsho isun Nuquin Papan mitsana icmendac. Unēsquio icsho aidēmbi mibi bēdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenquio iquendac. —Aid nibēdnuc unēsebi —mimbi caid Nuquin Papan icmendac. ²⁰Ēbi adsho tantiashun: —Bēdamboshē mibi iquec, Papa —quequin Nuquin Papa chuinuna ėnenquio icquin.

Pabodon ėnquimbi chiaid

²¹Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²²Adembidi nēmbo Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec. ²³Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidedi chuiquin dada uaombi.